

FAKE NEWS vum Schäfferot em de Waasserpräis

Datt de Bau vun der Jughurtsfabrick FAGE an der nationaler Industriezon Wolser zu Beetebuerg ëmstridden ass, dat weess jiddwieren. Virun allem well déi Fabrick relativ grouss Quantitéite wäert produzieren an deementspreechend och Drénkwaasser brauch fir ze fonctionnéieren.

Doropshin huet de Schäfferot d'Meenung verbreet, dass duerch déi Fabrick de Waasserpräis zu Beetebuerg zolidd an d'Luucht géif goen. De Schäfferot wier an engem Avis dovun ausgaangen, dass de Waasserpräis em 25 % kéint klammen. Mat deem Chiffer ass esouguer d'Ëmweltministesch un d'Presse gaangen.

Op eis Fro am Gemengerot vum 4. Mee hin krute mir net bestätegt, dass de Waasserpräis ëm 25% wäert klammen. Dës Estimatiounen sinn och zu kengem Moment mat konkreten Zuelen oder iergendwellech Verbrauchszenario beluecht ginn.

Desweideren ass der Ëffentlechkeet och verschleiert ginn, dass d'Industriezon direkt vum SES (Syndicat des Eaux du Sud) beliwwert gëtt, an net vun der Gemeng. Investitiounen un der Infrastruktur (Reseau, Waassertuerm) vun der Gemeng hunn also absolut näischt mat der Jughurtsfabrick ze dinn.

Wann de Waasserpräis fir den Normalverbraucher ugepasst gëtt, dann ass et well d'Gewinnerzuel zu Lëtzebuerg konstant wiest, virun allem an de Südgemengen (Schëffleng, Diddeleng). De Waasserschäffen huet dësen Zenario och bestätegt. An obwuel nach keng Jughurtsfabrick dosteet, ass, sengen Aussoen no, den Akafspräis vum Waasser fir d'SES Gemenge scho säit dem 1. Januar dëst Joer méi deier.

Esou einfach kënne FAKE News entstoen!

Mir bedauern, dass an deem heiten Dossier de Schäfferot ferm de Geck mat de Leit mécht andeems Informatiounen verdréit oder einfach falsch vermëttelt ginn, an op dësem Wee Stëmmung géint de Projet FAGE mécht.